

Qanoq iliornikkut nakorsat namminersortut nakorsiartarfiutitaarnissaminut aallartisarsinnaalernissaat aqutissiunneqarsinnaanersoq pillugu apeqquteqaat aallaavigalugu oqallisissiatut siunnersuut.

(Atassutip Inatsisartuni ilaasortaaitai)

Akissuteqaat

(Peqqinnissamut Naalackersuisoq)

Atassut-ip Inatsisartuni gruppiata oqallisissiatut siunnersuutaannut qujanaq.

Peqqissaasut namminersortutut peqqissaavinnik nunatsinni pilersitsisinnaanerat inatsisitigut periarfissaavoq. Ullumikkut kigutit nakorsaannik, timimik sungiusaasunik allanillu peqqinnissakkut sullissisunik namminersortunik Nuummi peqarpoq. Taamaattorli nunatsinni nakorsat namminersortut nakorsiartarfiutillit manna tikillugu suli takunikuunngilagut, taamaakkaluartorli peqqissutsimut tunngasut ineriartornerannut ilanngullugu periarfissap tamatuma oqallisigineqarnissaa pingaaruteqarpoq.

Peqqissaasut ilinniarsimasut namminersortut peqqissaavinnik, tassunga ilanngullugu nakorsiartarfinnik pilersitsisinnaanerat, assigiinngitsutigut anguneqarsinnaavoq, pisortatigut peqqinnissaqarfik suleqatigalugu suleqatiginaguluunniit. Namminersortup nakorsiartarfiutaa tunngaviusumik nammineerluinnarluni ingerlasinnaavoq. Nakorsat nakorsaatiniq tunniussiniarunik, nakorsaatit eqqunnissaannut qinnuteqaqqaartariaqarput. Nakorsiartarfik namminersorluni ingerlasoq namminerisamik suliffeqarfittut suliffeqarfiit allat assigalugit malitassatigut assigiimmillu atugassaqarlutik ingerlasinnaapput, kiffartuussinermillu ingerlatsisinnaallutik.

Namminersorluni nakorsiartarfik peqqinnissaqarfiup nakorsaataasivianit nakorsaatiniq tunniussisinnaatitaassappat allatigulluunniit peqqinnissaqarfimmi periarfissanik atuisinnaatitaassappat, tamatumani piumasaqaatit assigiinngitsut isumaqatigiissutigineqarsimanissaat pisariaqassaaq. Isumaqatigiissutit tamakkua ilaatigut peqqinnissaqarfimmi journalinut aaqqissuussat atornissaannut, nakorsaasersuinernut, laboratoriami misissukkanut, qinnguartaanikkut misissuinernut, scannerinernullu tunngasunik kiisalu pilataanissamut nakorsaatilluunniit atorlugit katsorsaanissamut innersuussinissamut pisinnaatitaanernik imaqsarinnassapput.

Nakorsaq nakorsiartarfirmik namminersorluni ingerlataqalerusukkuni ilassutaasumik misissuinissamik innersuusserusukkuni imaluunniit pisortatigut peqqinnissaqarfiit aqutigalugit immikkut ilisimasalinnit katsorsaanissamik innersuusserusukkuni, pisortani oqartussat peqatigalugit suleqatigiinnissamik isumaqatigiissuteqarsimasariaqarpoq.

Taamaattumik peqqinnermut tunngasunik suliallit namminersortut aamma pisortatigut peqqinnissaqarfiup akornanni annertuumik suleqatigiinnissaat eqqarsaatigalugu apeqqutinik pingaarutilinnik politikikkikkut eqqartorneqartariaqartunik pilersitsivoq. Assersuutigalugu nakorsap namminersortup pisortat peqqinnissaqarfia aqutigalugu laboratoriakut qinnguartaanikkulluunniit misissuititsiniaruni, nakorsaatinilluunniit tunniussiniaruni sullissinermullu akiliisoqarnissaa eqqarsaatigalugu qulaani apeqqutigineqartuni peqqinnissaqarfiup isumalluutitigut tatineqarenera eqqarsaatigisariaqarparput.

Nunatsinni namminersortut nakorsiartarfeqalernerannut atatillugu iluaqutaasinnaasut ajoqutaasinnaasullu pilersinneqarsinnaanerat Naalakkersuisuni eqqumaffigaagut. Aappaatigullu namminersortut nakorsiartarfeqalernerisigut, peqqissaasut peqqinnissaqarfimmi sulerusunnigikkaluartut peqqissaasut sulerusulerulersinneqarsinnaapput. Aappaatigulli nassuerutigisariaqarparput peqqissaasut pisortat peqqinnissaqarfianni sulisut namminersortut nakorsiartarfimmik pilersitsisalerpata tamanna peqqinnissaqarfiup nakorsanik immikkut ilisimasalinnik peqqissaasunillu sulisussaqaarniarnermigut unammilligassaqaareersumut sunniuteqarnerlussinnaavoq. Namminersorluni ingerlatsilerneq aamma namminersorlutik ingerlataqartunik suleqatigiinnissamik isumaqatigiissuteqarnerit allaffissornikkut aqutsinikkullu eqqumaffigineqartariaqarput, tassani piffissaq isumalluutillu allanut atorneqarsimasinnaagaluartut atorneqalissapput. Tamatuma peqatigisaanik misissortariaqarpoq kiisalu qanoq iliuuseqarfigissanerlugu isummerfigisariaqarpoq peqqinnissakkut taamatut ingerlatsinermi akiliisoqartalissappat qanoq innuttaasunut sunniuteqassanersoq peqqinnissamut kiffartuunneqarnissamut periarfissaalersussat pillugit.

Oqallilluarnissassinut kissaapassi.